

DÅP I FUSA SOKN

I. MOTTAKING TIL DÅP

L: I namnet åt Faderen, Sonen og Den heilage Ande. Med takk og glede tek kyrkjelyden imot *barnet/borna* som i dag skal bli *døypte/døypte* i Guds hus.

Gud har gjeve oss livet og skapt oss til fellesskap med seg. Etter sitt ord og sin lovnad tek Gud imot oss i dåpen og frelser oss frå synd og død. Vi blir sameina med Jesus Kristus til eit nytt liv og vi blir innlema i den kristne kyrkja.

For så elska Gud verda at han gav Son sin, den einborne, så kvar den som trur på han, ikkje skal gå fortapt, men ha evig liv. *Joh 3,16*

L: Lat oss høyra kor venleg Jesus tek imot borna og opnar Guds rike for oss:

ML/L: Dei bar små born til han for at han skulle røra ved dei; men læresveinane viste dei bort. Då Jesus såg det, vart han sint og sa til dei: "Lat småborna koma til meg og hindra dei ikkje; for Guds rike høyrer slike til. Sanneleg, eg seier dykk: Den som ikkje tek imot Guds rike slik som eit lite barn, skal ikkje koma inn i det." Så tok han dei inn til seg, la hendene på dei og velsigna dei.

Mark 10,3-16

Takkebøn

Vi takkar for barnet/borna og for at Gud vil ta imot det/dei i dåpen, og ber for livet som ligg framføre.

Ordet om dåpen og trua

L: Lat oss høyra vår Herre Jesu Kristi ord om dåpen og trua:

ML/L: Eg har fått all makt i himmelen og på jorda. Gå difor og gjer alle folkeslag til læresveinar: Døyp dei til namnet åt Faderen og Sonen og Den Heilage Ande, og lær dei å halda alt det som eg har bode dykk. Og sjå, eg er med dykk alle dagar så lenge verda står.

Matt 28,18-20

Forsakinga og trua

L: Lat oss saman vedkjennest forsakinga og trua som vi døyper borna våre til.

A: *Eg forsakar djevelen og alle hans gjerningar og alt hans vesen.*

Eg trur på Gud Fader, den allmektige, som skapte himmel og jord.

Eg trur på Jesus Kristus, Guds einborne Son, vår Herre, som vart avla ved Den Heilage Ande, fødd av Maria møy, pint under Pontius Pilatus, vart krossfest, døydde og vart gravlagd, fór ned til dødsriket, stod opp frå dei døde tredje dagen, fór opp til himmelen, sit ved høgre handa åt Gud, den allmektige Fader, skal koma att derifrå og døma levande og døde.

Eg trur på Den Heilage Ande, ei heilag, allmenn kyrkje, eit samfunn av dei heilage, forlating for syndene, oppstoda av lekamen og evig liv. Amen.

II DÅPEN

Bøn ved døypefonten (*Vatnet blir helt i døypefonten*)
Vi takkar for at Gud i dåpen gjev oss del i det Jesus Kristus har gjort for oss, og bed for det nye livet i Anden.

Dåpshandlinga

L: Vil de at NN skal døypast til namnet åt Faderen, Sonen og Den heilage Ande og oppsedast til eit liv i den kristne forsakinga og trua?

F: Ja.

L: Gud vare din inngang og din utgang frå no og til evig tid. Eg teiknar deg med det heilage krossmerket til vitnemål om at du skal høyra den krossfeste og oppstadne Jesus Kristus til og tru på han. Etter vår Herre Jesu Kristi ord og bod døyper eg deg til namnet åt Faderen, Sonen og Den heilage Ande.

Medan dette vert sagt auser liturgen tre gongar vatn over hovudet til barnet.

L: Den allmechtige Gud har no gjeve deg sin heilage Ande, gjort deg til sitt barn og teke deg inn i sin truande kyrkjelyd. Gud styrkje deg med sin nåde til det evige livet. Fred vere med deg.

Presentasjon.

Den døypte vert presentert som nytt medlem i kyrkjelyden.

III LIVET I DÅPEN

Tenning av dåpslys

L: Jesus seier: "Eg er lyset i verda. Den som fylgjer meg, skal ikkje vandra i mørkret, men ha livsens lys."

Joh 8,12

L: Kjære kyrkjelyd. Gjennom dåpen set Gud os inn i si verdsvide kyrkje og gjev oss del i Jesu kall og oppdrag. Lat oss stå saman i vitnemål og teneste, inntil den dagen kjem då alt det skapte skal bli forløyst ved vår frelsar, Jesus Kristus.

L: Vil foreldre og fadrar reise seg.

De er vitne om at *NN/desse borna* er *døypt/døypte* med den kristne dåpen. Saman med kyrkjelyden vår og heile kyrkja har de fått del i eit heilagt ansvar: Å vise omsorg for *han/henne/dei*, be for *han/henne/dei*, læra *han/henne/dei* å be og hjelpe *han/henne/dei* til å bruka Guds ord og delta i den heilage nattverden, så *ho/han/dei* kan leva og veksa i den kristne trua.

Fader vår

A: Fader vår, du som er i himmelen!

Lat namnet ditt helgast. Lat riket ditt koma.

Lat viljen din råda på jorda så som i himmelen.

Gjev oss i dag vårt daglege brød.

Forlat oss vår skuld, som vi òg forlèt våre skuldmenn.

Før oss ikkje ut i freisting, men frels oss frå det vonde.

For riket er ditt, og makta og æra i all æve. Amen.

L: Lova vere Gud, vår Herre Jesu Kristi Far, han som i si stor miskunn har fødd oss på nytt til ei levande von ved Jesu Kristi oppstode frå dei døde.

1. Pet 1,13